

Sayang-Sayang Jangan Sampai Naik Tocang

Bismillahirrahmanirrahim
Sollu 'alan Nabiy

Wahai saudara sebangsa dan seagamaku!

Atas nama muhibbah, kesatuan dan perpaduan kaum, maka kalau nak bersayang, bersayanglah. Kalau nak berkasih, berkasihlah. Kalau nak berjanji-setia, silakanlah! Tapi waspadalah, jangan sampai sayang kita kepada mereka menjadi keterlaluan sehingga sanggup membiarkan maruah diri diinjak-injak, jangan sampai kasih kita kepada mereka melampau batasan sehingga sanggup menikam bangsa sendiri dari belakang, jangan sampai sanggup berjanji setia sehingga tersasar jauh, sehingga agama Islam yang menjadi junjungan dan jantung hati nenek moyang kita tergolok tergadai dek terikut-ikut sangat pada tuntutan-tuntutan mereka yang semakin hari semakin menjadi-jadi.

Soalnya, berbalokah kita mencurahkan segunung kasih sayang dan sepenuh jiwa raga kepada mereka? Adakah curahan kasih sayang kita mendapat balasan yang setimpal? Acapkali, apa yang terjadi adalah umpama pepatah '*betis ku beri, peha yang kau minta*', '*madu ku beri, tuba kau balas*'!!

Sayang dan kasih kita kepada mereka yang tiada berbatasan, terleka dan lalai, sehingga alpa memelihara kepentingan bangsa dan agama sendiri, telah mencetuskan sebilangan mereka yang '*naik tocang*', lantang menuntut itu dan ini, yang mana tuntutan-tuntutan itu termasuk yang mencampuri hal ehwal rumahtangga bangsa kita, adat dan agama. Sampai hari ini kesucian adat, budaya dan hukum-hukum agama kita pun menjadi bahan cemekan, hinaan, provokasi dan cabar-mencabar, dituntut supaya kita meninggalkan warisan bangsa yang telah menjadi darah daging dan urat jantung kita selama beratus-ratus tahun, konon atas nama keharmonian serta perpaduan kaum yang berbilang bangsa, teras demokrasi dan pluralisme, mengikut arus kemodenan, perkampungan global, hak asasi kemanusiaan dan berbagai lagi alasan-alasan yang sebenarnya pincang.

Konsep '*give and take*' atau sikap bertolak ansur serta bertimbang rasa yang sekian lama menjadi fitrah bangsa kita kini secara praktisnya menjadi '*we give, give, give, you take, take, take*'.

Mengapa acapkali cinta, kasih sayang dan kesetiaan kita sahaja yang ditagih, dituntut dengan lantang untuk dibuktikan? Mengapa tidak mereka pula yang buktikan kasih sayang dan kesetiaan, kalau benarlah perasaan yang luhur itu wujud dalam sanubari mereka?

Kalau benar kasih sayang kita dihargai, apatah lagi dibalasi, cuba menuntut perasaan hormat kepada perkara-perkara yang istimewa dan sakral bagi kita seperti warisan adat dan syariat, bukan kita paksakan pun perkara-perkara tersebut kepada lingkungan mereka, malah kita menghormati dan tidak mengganggu adat dan budaya mereka. Mengapa balik-balik kita sahaja yang dituntut untuk meleburkan sempadan, meratakan batasan, mengorbankan hak dan kepentingan bangsa dan agama, atas nama muhibbah dan kasih sayang serta perpaduan kaum? Mengapa asyik-asyik kita yang perlu mengalah? **Mengapa asyik-asyik kita yang perlu bertolak ansur sehingga akhirnya dengan beransur-ansur kita ditolak!!**

Cerita ini bukanlah baru, tetapi telah berulang kali berlaku semenjak beratus-ratus tahun dahulu. Sejarah bangsa dan agama kita yang panjang telah memperlihatkan lagi dan lagi, natijah daripada curahan kasih sayang dan kesetiaan yang membuta tuli dan kurang

berwaspada, telah membawa padah, sehingga membawa mudarat dan memusibahkan bangsa.

Tidak perlu memandang pada kejauhan demi mencari iktibar. Cukuplah membuka mata kepada apa yang menimpa saudara sebangsa dan seagama dalam negara kita sendiri serta di negara jiran. Iktibar yang baik sebagai membuktikan bahawa kasih sayang kita, yang jika tidak dibendung dengan batasan adat dan agama, akan disia-siakan, tidak akan dibalas, umpama *'mencurah air ke daun keladi'*. Malahan telah mengorbankan kepentingan diri, bangsa dan agama, luput kehormatan, jatuh martabat, menjadi rakyat kelas bawahan, terhimpit di tengah-tengah kecanggihan serta kemodenan tanah air sendiri.

Hakikatnya, kita telahpun diberi amaran oleh Dia yang Maha Esa, Dia yang Maha Pencipta, Dia yang Maha Mengetahui, iaitulah Tuhan seru sekalian alam, Allah Rabbul Jalil. Melalui kalam RasulNya ﷺ, kita telahpun diperingatkan berkali-kali tentang kepalsuan dan perdaya golongan mereka, malahan telahpun diberi amaran keras tentang ancaman-ancaman mereka.

Allah SWT telah memberi amaran bahawa mereka semua adalah sama, satu millat (cara hidup). Kalau berlaku krisis, dikhuatiri ramai mereka akan bersatu menentang kita, membaham, meratah dan mengeronyok saudara-saudara kita, umpama orang-orang lapar yang disajikan makanan yang enak-enak di atas hidangan, dengan lahapnya diratah-ratah makanan tersebut penuh kerakusan!

Walaupun tidak semua mereka begitu, tetapi cukuplah daripada banyak pengalaman sejarah, termasuk sejarah bangsa kita sendiri, malahan daripada apa yang terpapar dalam peristiwa-peristiwa semasa, untuk kita mengambil iktibar dan teladan, supaya berhati-hati apabila berurusan dengan mereka, apatah lagi tentang perkara-perkara yang melibatkan kepentingan bangsa dan agama.

*Anak Che Limah di simpang empat,
Nampak musang berlari-lari,
Bangsa Melayu bukan merempat,
Mengapa hina diri sendiri.*

*Beras diisi dalam ketupat,
Hendak dijual di pasar Deli,
Bangsa Melayu hidup beradat,
Agama jangan dijual beli.*

*Ikan tenggiri ikan gelama,
Sambal belacan enak disaji,
Manusia mati tinggalkan nama,
Jangan mati bersepah keji.*

*Dayung ku dayung melayar sekoci
Sayup ku pandang pulau bersegi,
Siapa khianat agama yang suci,
Di alam akhirat mendapat rugi*

Perlembagaan Negara, Kedaulatan Islam dan Pertuanan Raja-raja Melayu

Apakah yang kita faham tentang Perlembagaan Negara Malaysia, tentang hak asasi dan kebebasan manusia, tentang realiti kehidupan masyarakat pluralistik atau berbilang kaum?

Sebagai umat Islam yang berpegang kepada konsep TAUHID, yakni segala-galanya adalah berputar, berpusat dan berpaksi kepada keEsaan ALLAH SWT sebagai Tuhan yang mencipta sekelian alam ini, maka berlandaskan kepercayaan ini, apa jua prinsip atau undang-undang yang digubal, hatta atas nama keamanan dan kesejahteraan manusia sejagat dalam perkampungan global ini, yang pada zahirnya nampak murni dan muluk-muluk belaka, namun tidak ada ertinya sama sekali jikalau tidak bersandarkan kepada *accountability* atau pertanggungjawaban manusia kepada Allah sebagai Khaliq.

Terlebih malang jikalau pertanggungjawaban umat Islam sendiri kepada Allah digantikan dengan pertanggungjawaban kepada hamba-hamba ciptaanNya semata-mata, secara mutlak dan muktamad, kerana umat Islamlah yang patut lebih insaf akan siapa Tuhan dan siapa hamba. Patut lebih kenal akan Allah daripada golongan yang tidak beriman. Tidak ada alasan lagi tentang hal ini.

Jikalau Allah SWT tidak diletakkan sebagai Tuhan Maha Esa yang wajib disembah mengikut fitrah yang sebenar, maka berlakulah suatu tragedi makhluk yang paling parah, iaitu penyembahan kepada yang selainNya. Maka terbuka luaslah pintu-pintu fitnah dan unsur-unsur kebatilan yang bakal menjemput berbagai kegawatan serta kecelakaan manusia dan 'alam.

Iaitu apabila perkara-perkara yang hak disamakan dengan yang batil, 'khalifah-khalifah' bumi diserahkan pada pemimpin-pemimpin yang zalim, beserta sistem-sistem mereka yang banyak mencetuskan budaya dan tamadun sengsara, tidak bermoral, bebas lepas daripada kawalan Tuhan. Orang-orang Islam menjadi sama nilai dan semartabat dengan golongan bukan Islam; nilai, tafsiran dan neraca Islam digantikan dengan kayu ukur sekular Barat; undang-undang Islam diletakkan bawah kaki undang-undang sekular Barat yang sentiasa diuar-uarkan sebagai yang paling baik, molek, bertamadun, adil dan berperni kemanusiaan .

Penyembah-penyembah hawa nafsu dan ejen-ejen Dajjal ini telah memeloporkan prinsip ketuanan dan keagongan manusia yang mutlak, yakni SISTEM SEKULAR-LIBERAL (sistem pengasingan agama dari segala urusan kehidupan manusia di bumi), bebas bersuara dan bertindak sesuka hati asal sahaja tidak mengganggu 'kesejahteraan awam' serta unsur-unsur moral yang bersifat subjektif. Itu '*bottomline*' nya, selainnya, '*anything goes*'.

Maka terbitlah undang-undang yang bertuhankan nafsu, dihukumkan harus untuk bertukar-tukar agama kerana dakwanya agama semua bertaraf sama yang membawa kebaikan (Pluralisme), tiada salahnya memadu asmara di khalayak ramai kerana bercumbuan tidak lain hanyalah suatu ekspresi cinta yang kudus (Liberalisme), tidak salah bagi pasangan yang belum berkahwin tinggal serumah konon untuk menguji keserasian, sila dedah-dedahkan batang tubuh anda kerana anda harus berbangga dengan 'anugerah Tuhan', halalkan perkahwinan sejenis kerana itu hak asasi manusia (LGBT) , silakan bercakap secara bebas lepas atas nama kebebasan bersuara ('Human Rights'), walaupun ia menyangkut perkara khurafat dan syirik, jom berkongsi keramaian agama masing-masing sebagai menunjukkan perpaduan dan kasih sayang antara manusia berlainan kaum, hari ini saya sembah Tuhan kamu, esok kamu pula sembah 'tuhan' saya.

Bagi mereka ini semua tidak mengapa, tiada salahnya, kerana '*love conquers all*' atau cinta mengatasi segalanya! Atau dalam praktiknya '*cinta menghalalkan segalanya*' !?! La haula wala quwatailla billah....

Konsep '*cinta mengatasi segalanya*' yang nampak muluk dan sering diuar-uarkan dalam rangkaian media propaganda Yahudi dan Nasrani (khususnya di filem-filem Hollywood) mengelabui realiti sebenar. Jangan sampai kita mudah terpedaya, apatah lagi konsep tersebut yang bersumber daripada falsafah '*tuhan itu cinta*' (*god is love*) hakikatnya adalah doktrin agama Nasrani. Atas prinsip ini, mereka menghalalkan segala-galanya kerana bagi mereka cinta itu sudah cukup untuk kesejahteraan manusia di mukabumi ini, kerana kononnya 'tuhan' telah melakukan pengorbanan paling besar untuk mencuci dosa manusia atas dasar cinta (iaitu peristiwa Nabi Isa disalib), walhal hakikatnya Nabi Isa AS telahpun diangkat ke langit oleh Allah SWT.

Dalam konteks masyarakat kita yang bersifat majmuk ini, kita perlulah sentiasa beringat dan berwaspada, iaitu dalam keghairahan melaksanakan berbagai program muhibbah dan perpaduan kaum, dengan semangat yang berkobar-kobar untuk berkongsi cinta dan kasih sayang, sehingga sanggup berkongsi segala-galanya dengan mereka, hatta perayaan agama dan budaya yang termasuk unsur-unsur syirik dan khurafat, pastikan jangan sampai kebatilan mereka menyelinap dan menular masuk ke dalam kelompok kita, ke dalam rumah tangga bangsa kita sehingga kehendak-kehendak Allah sendiri dibelakangkan.

Jangan sampai kita mudah terpedaya dan dikelirukan dengan konsep '*love conquers all*' itu, terperangkap dengan racun '*cinta yang (kononnya) menghalalkan segala-galanya*', sibuk dengan agenda-agenda dan program-program 'mengahwinkan' serta mencampurbaurkan semua kaum-kaum di Malaysia yang berlainan adat dan agama itu bagi melahirkan bangsa 'Malaysian Malaysia', sehingga terpaksa berkompromi dengan adat Melayu yang luhur dan syariat Islam yang suci murni.

Dalam negara Malaysia yang tercinta ini, kita diperingatkan berkali-kali betapa sakralnya undang-undang yang termaktub dalam Perlembagaan Persekutuan yang digubal oleh pejuang-pejuang kemerdekaan, yang mana sebilangan pihak telah mendakwa dan menguar-uarkan kononnya prinsip perlembagaan negara adalah berteraskan fahaman sekular, bagi mencerminkan realiti masyarakat majmuk atau berbilang kaum yang mulai muncul secara beramai-ramai pada zaman penjajahan British di awal abad ke 20 Masihi.

Persoalannya, adakah negara Malaysia wujud tiba-tiba secara ajaib selepas tahun 1957 tanpa sebarang latarbelakang pembangunan serta perkembangan sejarah, politik, sosio-budaya, ketamadunan serta peradaban yang panjang, penting dan berkesinambungan itu?

Apakah kita mahu melupakan realiti sejarah bangsa Melayu dan agama Islam yang telah menapak selama lebih 700 tahun lalu di tanah air tercinta dengan kesultanan-kesultannya yang hebat dan berdaulat, bertamadun dan berperadaban cemerlang, yang pernah menjadikan Kanun Adat dan Syariat sebagai undang-undang negeri, sehingga Melayu pernah menempa mercu di pentas politik dunia?

Atau tentang perencanaan kuasa-kuasa barat, khususnya British yang sememangnya tidak mahu kita kembali pada asal-usul dan warisan leluhur yang gemilang itu, lalu menekan Raja-raja Melayu untuk menurunkan tandatangan sebagai tanda persetujuan kepada campurtangan British, bermula dengan Perjanjian Pangkor di Perak dalam tahun 1874, kemudian menular kepada negeri-negeri Melayu yang lain, juga secara tekanan?

Adakah kita mahu meletakkan nilai picisan kepada perjuangan nenek moyang kita yang menumpahkan keringat, air mata dan darah dalam menentang penjajahan British semata-mata kerana tidak mahu undang-undang yang berpegang pada ketuhanan Allah yang Maha Esa, digantikan dengan undang-undang yang 'mentuhankan' manusia, materialisme dan hawa nafsu, iaitu sistem liberal sekular yang penuh kebatilan itu?

Apakah kita mahu melepaskan secara cuma-cuma ketuanan bangsa Melayu mahupun pertuanan Raja-raja Melayu yang telah memerintah dengan daulat, berkat dan rahmat semenjak kurun ke 14-15 sebagai *zilullahi fil ardhi* dan khulafa' Rasulullah ﷺ di tanah air kita yang tercinta ini? Sehingga golongan non-Moslem pun pernah mendapat limpahan kebaikan daripada leluhur kita dari kalangan ulama, umara dan masyarakat Melayu silam, yang sememangnya terkenal sebagai bangsa yang budiman, santun, pemurah dan berperilaku kemanusiaan?

Siapa yang patut dipertahankan, Allah SWT dengan segala aturanNya, ataupun golongan yang beriya-iyanya ingin mendirikan sistem liberal sekular yang mentuhankan manusia menggantikan Pencipta mereka??

Sedangkan Perlembagaan Malaysia pun ada tertera tentang pertuanan Raja-raja Melayu dan keutamaan Islam walaupun tidak semantap di zaman Melayu tradisi, yakni era tertegaknya Kanun Adat dan Syariat .

Harus jelas, atas pertanggungjawaban siapa pihak Majlis Fatwa Kebangsaan memutuskan sesuatu hukum?

Atas pertanggungjawaban siapa pihak Yang Arif para hakim membuat penghakiman mereka?

Atas pertanggungjawaban siapa Yang Amat Berhormat Perdana Menteri dan menteri-menteri kabinet mentadbir negara?

Atas pertanggungjawaban siapa KDYMM Yang Dipertuang Agong serta Raja-raja Melayu sekalian melaksanakan peranan sebagai ketua-ketua negara dan negeri?

Pertanggungjawaban atas nama Perlembagaan Malaysia?

Perlembagaan Malaysia pertanggungjawabannya kepada siapa? Raja? Rakyat? Raja dan rakyat pertanggungjawabannya kepada siapa?

Mana duduknya pertanggungjawaban kepada Allah Jalla Jallaluh sebagai pemilik KEDAULATAN TERAGONG DAN MUTLAK, iaitu Tuhan Pencipta makhluk dan alam yang hakiki? Sudah tertera dalam Perlembagaan Malaysia? Kalau sudah alhamdulillah, segala puji dan syukur bagiMu ya Allah! tetapi kalau belum moleklah diperbaiki, atas suatu alasan yang mudah, iaitu kita semua sebagai hamba-hamba Allah yang hina-dina ini pertanggungjawabannya adalah semata-mata kepadaNya sebagai Pencipta sekalian makhluk dan alam.

Hakikatnya, Allah beri amanah kepada Ulil Amri untuk mentadbir segala urusan hamba-hambaNya. **Itu amanah Allah, bukan mandat rakyat.** Dalam hal ini, DYMM Yang Dipertuan Agong dan Raja-raja Melayu adalah ketua-ketua pemerintah, yang mengambil amanah Allah SWT sebagai khalifah-khalifah Rasulullah ﷺ atas umat Islam berbangsa Melayu, serta kaum-kaum lain sebagai rakyat Raja-raja Melayu.

Dalam perlembagaan negara Malaysia, Perkara 37 Bahagian 1 jelas tertera Sumpah Jawatan bagi Yang di-Pertuan Agong sebagaimana berikut:

“ Kami, _____ ibni _____, Yang di-Pertuan Agong bagi Malaysia bersumpah dengan melafazkan: Wallahi, Wabillahi, Watallahi: maka dengan lafaz ini berikrarlah Kami dengan sesungguhnya dan dengan sebenarnya mengaku akan taat setia pada menjalankan dengan adilnya pemerintahan bagi Malaysia dengan mengikut sebagaimana undang-undang dan Perlembagaan yang telah

disahkan dan dimasyurkan di masa hadapan ini. Dan lagi Kami berikrar mengaku dengan sesungguhnya dan dengan sebenarnya memelihara pada setiap masa Agama Islam dan berdiri tetap di atas pemerintahan yang adil dan aman di dalam negeri.”

Sumpah jawatan yang di-Pertuan Agong Malaysia atas lafaz “*Wallahi, Wabillahi, Watallahi*” merupakan suatu ikrar bersumpah atas nama Allah, bukan sahaja merujuk kepada negara Malaysia sebagai negara yang berpaksi, berpasak dan menjunjung Allah dan RasulNya ﷺ, sekaligus meletakkan kedaulatan Raja-raja Melayu atas nama Allah yang Maha Esa lagi Maha Agong. Malahan atas lafaz yang mulia ini juga diikrarkan ketaatan kepada Allah “*pada menjalankan dengan ADILnya pemerintahan bagi Malaysia*”, yang sudah tentunya tafsiran atau makna bagi kalimah ‘adil’ itu perlu diambil daripada sumber Quran dan Hadith sebagai sumber utama bagi perundangan Islam, sebagaimana yang telah disepakati oleh jumbuh ulama ahlus sunnah wal jamaah yang menjadi asas, usul dan warisan turun temurun dalam perkembangan hukum-hakam serta perundangan kesultanan-kesultanan dalam negara ini. Dan bukannya konsep ‘adil’ pada tafsiran barat yang jauh tersasar daripada tafsiran agama Islam yang sebenarnya,

Kemudian, dalam payungan ikrar tersebut juga, sumpah jawatan yang di-Pertuan Agong juga meletakkan ikrar untuk “*memelihara pada setiap masa Agama Islam dan berdiri tetap di atas pemerintahan yang adil dan aman di dalam Negeri*”.

Jelas pada Sumpah Jawatan bagi Yang di-Pertuan Agong Malaysia menjadi bukti nyata bahawa baginda mengambil amanah Allah sebagai Ketua Negara, bukan mengambil mandat rakyat, tidak sepertimana yang berlaku dalam sistem politik demokrasi mutlak seperti kebanyakan negara-negara republik dunia. **Bermakna pertanggungjawaban baginda sekalian adalah kepada Allah SWT.**

Manakala Perdana Menteri, menteri-menteri kabinet dan pemimpin-pemimpin yang lain mentadbir negara atas mandat serta amanah baginda sekalian (cuma sistem pemilihan mereka dibuat dengan kaedah demokrasi). Bermakna pertanggungjawaban mereka adalah kepada Raja-raja Melayu yang memerintah atas amanah Allah itu. Rakyat pula sudah tentu duduknya di bawah pertuanan DYMM Yang Dipertuan Agong dan Raja-raja Melayu.

Itulah hakikatnya sistem pemerintahan yang memegang amanah Allah. Negara Malaysia yang merdeka merupakan pemersekutuan kesultanan-kesultanan Melayu di bawah Perlembagaan Persekutuan yang hakikatnya mengambil sumber kuasa daripada Raja-raja Melayu yang memegang AMANAH ALLAH! Maka jikalau wujud kepincangan atau kelemahan di mana-mana, maka perlulah diperbaiki kepincangan tersebut supaya jangan sampai pemimpin-pemimpin kita terpaksa bersoal-jawab dan dipertanggungjawabkan atas kesalahan mengkhianati amanah Allah di Mahkamah AgongNya pada Hari Perhitungan kelak.

Sekurang-kurangnya perlu ada inisiatif untuk meningkatkan kembali peranan Institusi Raja-raja Melayu sebagai tonggak bangsa dan agama yang berdaulat, memberi kesedaran kepada baginda sekalian tentang peranan sebagai khalifah-khalifah Rasulullah ﷺ sebagaimana tanggungjawab yang dilaksanakan dengan penuh keinsafan oleh nenek-moyang Raja-raja Melayu dahulukala sebelum pcampurtangan kuasa British merosakkan teras pemerintahan tradisional orang-orang Melayu yang bertunjangkan Hukum Adat dan Syariat itu.

Selain itu perlu ada inisiatif untuk melindungi serta mempertahankan kedudukan Islam dalam martabat sebenarnya sebagai Agama Persekutuan dalam perlembagaan negara serta berusaha pula untuk memantapkannya secara istiqomah.

Jikalau suara-suara sumbang mengapi-apikan kenyataan bahawa pejuang-pejuang kemerdekaan Malaysia bertanggungjawab penuh dalam meletakkan fahaman sekular

sebagai batu asas kepada prinsip perlembagaan negara Malaysia yang merdeka, dan kita sebagai generasi-generasi kemudian tidak boleh membetulkan kesilapan pejuang-pejuang kemerdekaan itu (yang tentunya tidak *maksud*) dalam sebahagian daripada apa yang mereka perjuangkan (yakni sistem sekular), maka jawabnya tepuk dada tanyalah iman.

Kalaupun doktrin sekular sememangnya telah dihasratkan oleh sebahagian pejuang-pejuang kemerdekaan kita sebagai batu asas kepada perlembagaan negara Malaysia, maka pertamanya, perlulah dikaji semula secara halus dan terperinci, atas latarbelakang sejarah dan siasah apakah doktrin tersebut digubal (iaitu tentang agenda penjajah British yang tersirat). Kedua, bahawa fahaman yang menerbitkan sistem sekularisme merupakan suatu **sumpahan kepada ummah sejagat**, mengekang potensi mereka yang sebenar, umpama harimau yang dikandang dalam jaringan besi, hanya berupaya mendengus dan mengaum hebat sambil menyeringa mempamerkan gigi-giginya yang besar dan tajam, namun langsung tidak digeruni oleh pemerhati-pemerhati di sekelilingnya kerana harimau tersebut dikekang oleh jaringan-jaringan besi yang mengandangnya.

Jangan sampai atas nama doktrin perlembagaan yang sekular, gejala-gejala liberalisme (baca: bebas lepas dan bebas laku) dibiarkan mentancapkan akar umbinya dalam masyarakat kita, hak kebebasan bersuara tanpa batasan menjadi alasan untuk kaum-kaum lain campur tangan dalam rumah tangga bangsa dan agama kita, hak asasi kemanusiaan (tafsiran Barat) mengatasi hak-hak Allah atas hamba-hambanya. Jangan sampai kita menjadi dayus dalam gelanggang sendiri, berpeluk tubuh dengan cabaran-cabaran dan provokasi-provokasi liar dan lantang yang cuba melaga-lagakan undang-undang manusia (baca: Barat) dengan undang-undang Allah SWT atas nama perlembagaan sekular.

Hakikatnya, adalah suatu yang silap untuk mengamalkan sistem sekular dalam manapun pemerintahan negara-negara umat Islam termasuklah di tanah air kita yang tercinta ini.

Ingatlah, pemimpin-pemimpin umat Islam termasuk pemimpin-pemimpin politik kita adalah memerintah atas amanah Allah, walaupun mendapat mandat rakyat. Pertanggungjawaban kita semua adalah kepada Allah dan Dia telah mengaturkan struktur pentadbiran/pengurusan makhluk dan alam yang lengkap, sempurna, penuh kerahmatan, termasuklah dalam persoalan-persoalan orang-orang bukan Islam, binatang-binatang yang melata, tumbuh-tumbuhan, sistem cakerawala mahupun alam ghaib seperti alam jin dan sebagainya. Jikalau Allah sudah meletakkan kepala di atas tubuh badan, kenapa pula makhluk cuba memandai-mandai meletakkan kepala di bawah telapak kaki, lalu meletakkan kaki pula atas kepala, tidak ke haru-biru jadinya !!

Wahai saudaraku!

Bukan tak boleh sayang, tapi biarlah bertempat. Program-program muhibbah dan perpaduan kaum adalah usaha-usaha yang baik dan murni demi memelihara keamanan dan kesejahteraan rakyat yang berbilang bangsa dan agama di Malaysia ini.

Bagaimanapun sebagai umat Islam, kita perlu sentiasa beringat tentang amaran-amaran Allah SWT mengenai dendam Iblis laknatullah serta programnya untuk menyesatkan anak cucu Nabi Adam AS sehingga sampai Hari Kiamat nanti.

Dalam surah Al-Hijr ayat 39-40 telah disebut:

“ Ya Tuhanku! Oleh sebab Engkau telah memutuskan bahawa aku sesat, pasti aku akan menjadikan mereka memandang baik (perbuatan maksiat) di mukabumi, dan pasti aku akan menyesatkan mereka semua, kecuali hamba-hamba Engkau yang mukhlas (bertaqwa) diantara mereka.”

Firman Allah SWT di tempat yang lain :

“ Orang-orang Yahudi dan Nasrani tidak suka kepadamu kecuali kalau kamu turut agama mereka. Katakanlah, sesungguhnya petunjuk Allah itulah sebenar petunjuk. Demi, jika kamu turut kemahuan mereka, setelah kamu mendapat pengetahuan, tidak adalah bagimu wali dan penolong dari (siksa) Allah.” (Al-Baqarah : 120)

Firman Allah SWT lagi :

“ Apabila datang kepada engkau orang-orang munafiq, mereka berkata : Kami menjadi saksi bahawa engkau (Ya Muhammad) sungguh Rasul Allah. Allah mengetahui, bahawa engkau RasulNya dan Allah menjadi saksi (mengetahui) pula, bahawa orang-orang munafiq itu dusta. Mereka jadikan sumpah mereka (bahawa mereka Muslim) untuk memelihara (melepaskan diri mereka), lalu mereka menghalangi (manusia) dari jalan (agama) Allah. Sungguh amat jahat apa-apa yang mereka kerjakan. Demikian juga, kerana mereka beriman (pada zahirnya), tapi kafir (pada batinnya), lalu ditutup mata hati mereka, sehingga mereka tiada mengerti.” (Al-Munafiqun : 1-3)

Berdasarkan peringatan-peringatan keras dari Allah SWT melalui FirmanNya, kita sebagai umat Islam perlulah berhati-hati dengan perangkap syaitan dan Iblis yang ramai askar-askarnya termasuklah dari kalangan orang-orang kafir dan golongan munafiqun yang menyelip di tengah-tengah kelompok umat Islam sendiri. Malahan kita ada banyak fakta-fakta sejarah sebagai hujjah tentang mara bahaya ini. Ambillah iktibar dan teladan daripada sejarah jatuh-bangunnya peradaban dan bangsa-bangsa umat Islam di merata mukabumi ini.

Maka dalam keghairahan melaksanakan program-program muhibbah dan perpaduan kaum, pastikan batasan adat dan agama kita tetap terpelihara dan terlindung daripada unsur-unsur kebatilan dari fahaman sesat dan ideologi agama-agama lain yang tidak ada ruang langsung di sisi Allah SWT. Jangan sampai saudara-saudara seagama kita mendapat tempias kebatilan mereka, mengganti Tuhan, daripada menyembah Allah kepada penyembahan yang selainNya seperti pemujaan materialisme dan hawa nafsu yang tidak ada kesudahannya itu.

Sehinggalah kebatilan mereka menular pantas dalam kelompok kita, menyelip masuk ke gelanggang, rumah tangga, hatta ke bilik tidur-bilik tidur kita, menjadi duri dalam daging, mencetuskan berbagai kemaksiatan dan gejala sosio-budaya yang jelek dalam masyarakat, berbaur unsur-unsur hedonisme dan satanik yang sangat memudaratkan! Maka terlaksanalah cita-cita syaitan dan Iblis yang memperalatkan mereka untuk menyesatkan kelompok kita, bakal menempa azab Allah Jalla Jallaluh di Hari Akhirat nanti. Nauzubillah....

Kesimpulannya; Sayang Biarlah Bertempat.

Ingatlah bahawa tanah air kita yang pernah bernama Semenanjung Tanah Melayu ini bukan sahaja mempunyai majoriti rakyat berbangsa Melayu beragama Islam, malahan yang terlebih penting, mempunyai warisan sejarah yang panjang dan penting sebagai daulah-daulah Islamiyyah dalam bentuk kesultanan-kesultanan Melayu.

Semenanjung Tanah Melayu adalah milik asal orang-orang Melayu secara turun temurun, sebagaimana negara-negara lain juga menjadi milik asal bangsa-bangsa mereka

seperti China, India, Eropah, Russia, negara-negara Arab dan banyak lagi. Leluhur kita berpegang kepada gagasan MELAYU ISLAM BERAJA, dengan pengamalan Kanun ADAT MELAYU dan SYARIAT ISLAM, walaupun belum lengkap dan sempurna, tetapi masih dalam kerangka pemerintahan bercirikan Islam, sekali-kali bukan sekular !!

Patut-patutlah kita sentiasa beringat tentang kedudukan dan hak istimewa orang-orang Melayu yang sudah tentunya beriman ini, kerana warisan ketamadunan/ peradaban Melayu Islam yang lama dan mencapai kematangan, dengan pertuanan Raja-raja Melayu adalah gabungan ampuh sebagai pemegang amanah Allah untuk terus mentadbir dan mengurus bumi bertuah ini.

Jangan dilupakan warisan yang sakral ini, hanyasanya atas asakan-asakan dan desakan-desakan mereka yang jahil pada hakikat sejarah Tanah Melayu yang sebenar, apatah lagi asakan-asakan dari mereka yang bukan Islam.

Dalam hal ini kita perlu isytihar atau gazetkan secara terang dan nyata, secara TEGAS, TELUS, TULUS, tentang apakah bingkai khusus yang sakral, istimewa dan penting bagi kita. Kita tidak akan berkompromi dalam hal-hal tersebut dan Perlembagaan Persekutuan perlu dipertahankan atas asas-asas ini, iaitu :

Pertama :

Mendokong faham 'Islam sebagai Agama Persekutuan' sebagai tafsiran yang tepat bagi Perkara 3(1) dalam Perlembagaan Persekutuan.

Kedua :

Tentang Pertuanan Raja-raja Melayu sebagai tonggak agama Islam dan bangsa yang berdaulat, bukan atas dasar simbolik semata-mata.

Ketiga :

Tentang Hak Istimewa agama Islam dan orang-orang Islam. Tentang fahaman Islam umat Melayu dalam golongan Ahlus-Sunnah Wal-Jamaah beraqidah Asya'irah wa Maturidiyyah dengan Mazhab Syafi'e sebagai mazhab resmi sekaligus meraikan mazhab-mazhab muktabar yang lain.

Keempat :

Tentang Hak Istimewa orang-orang Melayu khususnya di Semenanjung Tanah Melayu sebagai pemilik asal tanah air ini semenjak berkurun lamanya. Serta hak keistimewaan golongan bumiputera yang lain.

Marilah sama-sama kita saling ingat-memperingatkan supaya jangan sampai kerangka dan struktur pemerintahan Tanah Melayu menjadi hamba kepada sistem demokrasi-sekularisme-liberalisme yang mempunyai pertahanan semulajadinya yang bukan sahaja menjamin kelahiran demi kelahiran generasi-generasi umat Melayu yang terjajah mental dan budayanya serta sentiasa bersifat pro-Barat (Yahudi dan Nasrani), malahan ia juga dapat memastikan semakin lama semakin terpisah bangsa Melayu daripada jatidiri dan hakikat leluhurnya.

Jikalau perhambaan kepada sistem batil ini dibiarkan mencengkam, mendominasi serta mengongkong tanah air kita yang tercinta ini, tanpa segera dibendung khususnya melalui peranan Institusi Raja-raja Melayu, institusi-institusi dan 'Ngo-ngo' Melayu dan Islam, institusi ulama, para cendekiawan dan akademik, serta tokoh-tokoh dan ahli-ahli masyarakat yang mempunyai Zikr, Fikir dan Fi'il amal soleh yang *kaffah* (total), yang cenderung agar budaya *jahiliyah-yatsribiyah* masakini menjadi *adabiyah-diniyah* (peradaban yang beragama, tertib dan indah, berpedoman imani dan ilmu al-Quran dan as-Sunnah), maka janganlah hairan jika dalam dua atau tiga generasi lagi identiti dan jatidiri bangsa Melayu yang sebenar

hanya tinggal pada nama sahaja dan legasinya hanya terpapar dalam muzium-muzium sejarah.

Yakni seperti keris yang pernah menjadi simbol identiti, jati diri, kekuatan, kekuasaan dan kedaulatan bangsa tetapi kini hanya sebagai penghias di ruang-ruang muzium dalam kategori barang-barang antik. Anak-anak Melayu bertukar menjadi John dan James menggantikan nama Ismail dan Abdul Rahman, atau Angela dan Vannesa menggantikan nama Aishah dan Khadijah.

Pada masa itu keluar air mata darah sekalipun sudah tidak berguna lagi kerana generasi Melayu hari ini gagal membendung kemerbahayaan tsunami sistem sekular-liberal Barat yang sesat lagi menyesatkan, dengan sikap yang terang-terang mengalah atau memberi alasan sudah realiti zaman, kalah sebelum berjuang, merealisasikan *self fulfilled prophecy, defeatists attitude!!*

Cukuplah beberapa tempat dalam negara kita serta negara-negara jiran menjadi contoh dan iktibar yang nyata. Segala kecanggihan, kemajuan dan kemodenannya sedikitpun tidak menguntungkan, malahan memudaratkan orang-orang Melayu dan umat Islam di situ.....

Mungkin kita ada alasan jikalau sekiranya kita tinggal di negeri 'non-Moslem', kerana dalam keadaan demikian kita memang tidak ada kekuasaan mahupun keupayaan. Tetapi apakah alasan kita yang dalam negara yang asalnya merupakan Daulah Islamiyyah dalam bentuk kesultanan-kesultanan Melayu, nenek moyang kita turun temurun menjadi tuan dan pemilik asal negeri, menjunjung adat dan agama yang luhur selama beratus tahun sehingga ditakdirkan kalut disebabkan campurtangan kuasa British yang pernah menjadi suatu empayar dunia yang besar dan gagah?

Namun kita sudah lama merdeka, kuasa sudah dikembalikan dalam tangan kita walaupun terpaksa menerima realiti masyarakat majmuk yang dipaksakan oleh penjajah British suatu masa dahulu.

Alhamdulillah, sehingga hari ini umat Melayu Islam masih lagi memegang tampuk pemerintahan, majoriti penduduk masih dalam tangan bangsa kita, malahan masih wujud sistem Raja-raja berperlembagaan yang masih berkuasa walaupun sedikit terhakis, maka apakah lagi alasan kita??? Nah, tepuk dada tanyalah iman!!

Semoga Allah SWT memberikan kita pertolongan yang kuat. Amiin ya Robbal 'alamiin.

Wallahu 'alam bissawab

Intaha. Yang baik dari Allah dan yang buruk atas kelemahan diri al Faqirah.

TSTHO